

STJÓRNARTÍÐINDI B 3 — 1971

3. janúar 1971.

9

Nr. 4.

REGLUGERÐ

um Raunvísindastofnun Háskólans.

1. gr.

Heiti stofnunar og tengsl hennar við Háskóla Íslands.

Stofnunin heitir Raunvísindastofnun Háskólans og er háskólastofnun, sem heyrir undir verkfræði- og raunvísindadeild, og fjallar deildarráð um málefni stofnunarinnar, nema er um almenn háskólamál ræðir. Í því atviki fjallar háskólaráð um málín.

2. gr.

Starfssvið.

Aðalstarf stofnunarinnar er undirstöðurannsóknir á sviði stærðfræði, eðlisfræði, efnafræði og jarðvísinda, en bæta má við rannsóknarstofum eða undirstofnunum á öðrum sviðum raunvísinda, eftir því sem síðar kann að verða mælt fyrir um og fé veitt til í fjárlögum eða á annan hátt.

3. gr.

Skipulag Raunvísindastofnunar Háskólans.

Stofnunin skiptist fyrst um sinn í fjórar rannsóknarstofur, sem starfa á eftirtöldum sviðum:

I. Rannsóknarstofa í stærðfræði.

Starfssvið: Stærðfræðilegar greinar: Stærðfræði, stærðfræðileg eða teoretisk eðlisfræði, hagnýtt stærðfræði.

II. Rannsóknarstofa í eðlisfræði.

Starfssvið: Tilraunaleg eðlisfræði, þ. á m. fyrst um sinn jarðeðlisfræðilegar mælingar, sem framkvæmdar eru í vinnustofu (laboratorium).

III. Rannsóknarstofa í efnafræði.

Starfssvið: „Teoretisk“ og tilraunaleg efnafræði.

IV. Rannsóknarstofa í jarðvísindum.

Starfssvið: Jarðvísindi, þ. á m. jarðeðlisfræði, jarðfræði, og jarðefnafræði, og rekstur jarðvísindalegra athugunarstöðva.

Stjórn sker úr vafaatriðum í sambandi við skiptingu verkefna milli rannsóknarstofa.

Stjórn er heimilt með samþykki menntamálaráðuneytisins að skipta rannsóknarstofum í deildir og fela starfsmanni deildarstjórn.

4. gr.

Forstaða fyrir rannsóknarstofum.

Fyrir hverri rannsóknarstofu er forstöðumaður, sem hefur á hendi stjórn vísindalegra rannsókna og stendur fyrir daglegum rekstri rannsóknarstofu undir yfirstjórn stjórnar. Menntamálaráðherra skipar forstöðumenn til allt að fimm ára í senn að fengnum tillögum deildarráðs verkfræði- og raunvísindadeildar. Forstöðumenn skulu fá sérstaka þóknun fyrir forstöðustarfið samkvæmt ákvörðun ráðherra, að fengnum tillögum háskólaráðs.

5. gr.

Stjórn.

Stjórn stofnunarinnar skipa sex menn sem hér segir:

- a) Forstjóri, sem er formaður stjórnarinnar, kosinn til allt að fimm ára í senn af háskólaráði úr hópi prófessora Háskólans í þeim greinum, sem undir stofnunina falla. Forstjórinn skal hafa umsjón með framkvæmd á ákvörðunum stjórnarinnar og hafa eftirlit með allri starfsemi, sem heyrir ekki undir ákveðna rannsóknarstofu. Hann kemur og fram fyrir stofnunina í heild.
- b) Fjórir forstöðumenn rannsóknarstofanna.
- c) Vísindalega menntaðir starfsmenn, tilgreindir í 7. gr. I 4. A. a) og b), kjósa úr sínum hópi einn mann í stjórnina. Skal hann hafa starfað við stofnunina samfleytt í eitt ár. Kosning hans gildir í eitt ár frá 1. september að telja.

Stjórnin fjallar um öll sameiginleg málefni stofnunarinnar, fer með fjármál hennar, gengur frá rekstraráætlun og tillögum til menntamálaráðuneytisins um fjárveitingu til stofnunarinnar og skiptingu fjárveitingar milli rannsóknarstofa. Stjórnin tekur ákvörðun um rannsóknarverkefni og önnur verkefni, sem taka skal upp eða fella niður innan stofnunarinnar. Stjórnin fjallar um ráðningar vísindamennnaðs starfsfólks svo og annars starfsfólks, sbr. 7. gr.

Nú verða atkvæði jöfn á stjórnarfundum, og ræður þá atkvæði formanns. Stjórnin getur skotið málum til deildarráðs eða háskólaráðs til úrskurðar eða samráðs. Ráðherra ákveður þóknun forstjóra, að fengnum tillögum háskólaráðs.

6. gr.

Fjármál.

Stofnunin hefur sjálfstætt fjárhald, og ber sjálfstæða fjárabyrgð.

Rekstur stofnunarinnar er kostaður af ríkisfé samkvæmt því sem veitt er í fjárlögum hverju sinni.

Aðrar tekjur eru þessar:

- a) Styrkir til einstakra rannsókna samkvæmt umsókn.
- b) Styrkir eða greiðsla fyrir umbeðin verkefni.
- c) Gjafir.

Öflun tekna á þennan hátt og ráðstöfun þeirra er háð samþykki stjórnarinnar. Árlegur stofnkostnaðar- og rekstrarreikningur stofnunarinnar skal sendur Ríkisendurskoðuninni til endurskoðunar ásamt fylgiskjölum. Samrit reikningsins sendist menntamálaráðuneytinu.

Í ársreikningi skal einnig gera grein fyrir tekjum samkvæmt a—c lið.

7. gr.
Starfslið.

I.

Starfsmenn stofnunarinnar eru:

1. Forstjóri og forstöðumenn rannsóknarstofa, sbr. 5. og 4. gr.
2. Prófessorar eða gistiprófessorar við Háskólann í þeim greinum, er undir stofnunina falla, eiga kost á vinnuaðstöðu við stofnunina, þ. á m. nauðsynlegri rannsóknaraðstoð, eftir því sem aðstæður leyfa að dómi stjórnarinnar. Skulu þeir þá vera forstöðumanni viðkomandi rannsóknarstofu til ráðuneytis um vísindaleg málefni hennar, svo sem um verkefnaval o. fl. Heimilt er að greiða þeim sérstaka þóknun fyrir starf sitt við stofnunina samkv. ákvörðun ráðherra, að fengnum tillögum háskólaráðs, er leitar álits stjórnarinnar.
3. Dósentar og lektorar við Háskólann, sem starfa að rannsóknum á sviðum, sem undir stofnunina falla, og stjórnin veitir vinnuaðstöðu við stofnunina.
4. Aðrir starfsmenn við rannsóknarstörf.
 - A. Vísindalega menntaðir starfsmenn.
 - a) Fastráðnir starfsmenn.
 - b) Starfsmenn ráðnir til takmarkaðs tíma, 1—3 ára.
 - c) Lausráðnir starfsmenn, ráðnir til skemmri tíma en 1 árs.
 - d) Starfsmenn ráðnir til hluta af starfi við stofnunina, t. d. að öðrum hluta ráðnir til kennslustarfa við menntaskóla eða kennaraskóla eða Háskólann sjálfan, svo sem dósentar og lektorar, sjá 3.
 - e) Styrkþegar, sem njóta styrks, t. d. frá Vísindasjóði, og fá vinnuaðstöðu við stofnunina um takmarkaðan tíma.

Starfsmenn A, a) — d), skulu hafa lokið háskólaprófi, og getur stjórnin skipað þeim í tvo starfsflokka eftir menntun og vísindalegri hæfni með samþykki deildarráðs.

B. Tæknimenntaðir starfsmenn.

- a) Fastráðnir starfsmenn.
- b) Lausráðnir starfsmenn.

C. Aðstoðarmenn.

- a) Fastráðnir aðstoðarmenn.
- b) Aðrir aðstoðarmenn, þ. á m. stúdentar.

Vísindalega menntaðir starfsmenn, 4. A. a) og b), skulu ráðnir til rannsóknarstarfa, en þó skal, ef deildarráð óskar, setja ákvæði um kennslu við Háskólann í ráðningarsamning, enda skal ráðning þessara manna gerð með vitund deildarráðs og því gefinn kostur á að óska eftir slíku ákvæði. Þó skal kennslustarfið ekki vera meira en þriðjungur starfsins þann tíma, sem kennslan stendur yfir. Starfsmönnum, sem annast kennslu samkv. þessu ákvæði, skal ákveða aukabókun að fengnum tillögum háskólaráðs.

5. Starfslið á skrifstofu og almennt starfsfólk.

Ráðið skal starfslið á skrifstofu, þ. á m. skrifstofustjóri, sem sér um almennt framkvæmdastörf samkv. erindisbréfi, er stjórnin setur honum, svo og annað almennt starfsfólk stofnunarinnar.

II.

Ráðherra ræður starfslið Raunvísindastofnunar Háskólans, að fengnum tillögum stjórnar stofnunarinnar og deildarráðs. Ráðherra getur falið stjórn stofnunarinnar ráðstöfun starfa til eins árs eða skemmri tíma, enda sé fjárveiting fyrir hendi.

Um starfskjör fer eftir ákvæðum laga nr. 55/1962, um kjarasamninga opinberra starfsmanna.

8. gr.

Reglugerð þessi er sett samkvæmt 9. gr. laga nr. 84/1970, um Háskóla Íslands, sbr. háskólareglugerð nr. 76/1958, 87. gr.

Reglugerðin öðlast þegar gildi, og fellur jafnframt úr gildi reglugerð nr. 104/1966, um Raunvísindastofnun Háskólans, ásamt breytingu samkv. reglugerð nr. 39/1968.

Í menntamálaráðuneytinu, 3. janúar 1971.

Gylfi P. Gíslason.

Birgir Thorlacius.

REGLUGERÐ

um tollfrjálsar verðlanir á Keflavíkurflugvelli á vegum ríkisins.

1. gr.

Starfræktar skulu, á vegum ríkisins, sölubúðir á Keflavíkurflugvelli, er selja tollfrjálsar vörur, farþegum og áhöfnum millilandaflugvéla. Nafn sölubúðanna skal vera: Frihöfnin, Keflavíkurflugvelli.

Í Frihöfninni má selja hvers konar varning, eins og tíðkast í frihöfnum erlendis.

Í sölubúð þeirri, sem ætluð er farþegum og áhöfnum, sem eru að koma til landsins, skal þó aðeins heimilt að selja eftirtalinn varning, svo sem tíðkast hefur, og innan eðlilegra takmarka, að mati tollgæzlunnar:

Áfengi, tóbak, sælgæti, ilmvoðn, snyrtivörur og filmur. Utanríkisráðherra getur heimilað fleiri tegundir varnings, ef ástæða þykir til.

2. gr.

Frihöfninni skal stjórnað af frihafnarstjóra, sem utanríkisráðherra skipar, og ber hann ábyrgð á rekstri hennar undir yfirstjórn utanríkisráðherra.

Annað starfslið, sem nauðsynlega þarf við daglegan rekstur Frihafnarinnar, skal frihafnarstjóri ráða með samþykki utanríkisráðherra.

3. gr.

Að því er varðar farþefa og áhafnir, sem eru að fara af landi brott, skal tollgæzlan á Keflavíkurflugvelli sjá um og bera ábyrgð á, að gætt sé nauðsynlegra varúðarráðstafana um meðferð seldrar vöru, unz komið er um borð í flugvél þá, sem er á förum.

Þá skal þess og gætt, að farþegar og áhafnir, er verzla við komu til landsins, færi varning sinn beint til tollgæzlumanns.